

Keputusan petisyen Nik Elin beri impak besar terhadap kuasa Sultan, Raja Negeri – PPMM
Astro Awani
09 Februari 2024
Sinar Harian

PUTRAJAYA: Keputusan Mahkamah Persekutuan berhubung petisyen yang difailkan peguam, Nik Elin Zurina Nik Abdul Rashid ke atas Dewan Undangan Negeri (DUN) Kelantan telah memberi impak besar kepada kuasa negeri di bawah sultan atau raja.

Presiden Persatuan Peguam- Peguam Muslim Malaysia (PPMM), Muhamad Hisham Marzuki berkata, ia khususnya cabaran yang dikemukakan iaitu penafsiran punca kuasa di dalam membuat undang-undang jenayah di Malaysia.

"PPMM menegaskan bahawa daripada keputusan kes ini ia jelas menunjukkan bahawa telah memberi impak besar kepada kuasa negeri di bawah sultan atau raja," katanya menerusi kenyataan pada Jumaat.

Menurut beliau, pihak kerajaan melalui cabang legislatif digesa untuk melakukan tindakan segera di dalam membuat sebarang pindaan-pindaan yang wajar.

"Ini bagi memastikan undang-undang kuasa negeri dapat dikekalkan atau ditambah baik dalam hal ehwal agama Islam untuk mengelakkan kelompongan di dalam bidang kuasa sedia ada," ujarnya.

Jelas Muhamad Hisham, tindakan yang lebih efektif perlu dilakukan oleh Jawatankuasa Mengkaji Kompetensi Dewan Undangan Negeri Untuk Menggubal Undang-Undang Islam di dalam memberikan syor yang terbaik kepada kerajaan agar pertindihan kuasa negeri khusus berkenaan hal ehwal islam dapat diselesaikan.

"Syor-syor ini diharapkan dapat memberi manfaat kepada umat islam di dalam mengamalkan ajaran islam dan dilaksanakan dengan kadar segera sekali gus menutup ruang cabaran undang-undang seperti ini pada masa akan datang," katanya.

Beliau yakin pelbagai usaha yang jitu perlu dilakukan oleh semua pihak yang berkepentingan di dalam memastikan kuasa negeri khusus berkenaan hal ehwal agama islam dapat dipelihara.

"Usaha tersebut dapat dilaksanakan melalui kuasa yang termaktub di dalam Perlembagaan Persekutuan demi mengarusperdanakan syariah," katanya.

Mahkamah Persekutuan di sini pada Jumaat, mengisytiharkan 16 daripada 18 peruntukan dalam Enakmen Kanun Jenayah Syariah (I) Kelantan 2019 adalah terbatal dan tidak sah.

Panel hakim diketuai Ketua Hakim Negara, Tun Tengku Maimun Tuan Mat memutuskan demikian selepas membenarkan petisyen Nik Elin Zurina dan anaknya Tengku Yasmin Nastasha Tengku Abdul Rahman selaku pempatisyen bagi mencabar 18 peruntukkan enakmen tersebut. - Sinar Harian

© 2024 Astro AWANI Network Sdn. Bhd. 200001032668(535275-D) All Rights Reserved.

Source: <https://www.astroawani.com/berita-malaysia/keputusan-petisyen-nik-elin-beri-impak-besar-terhadap-kuasa-sultan-raja-negeri-ppmm-457586>